

AWIG - AWIG



**DESA ADAT TOHPATI
KECAMATAN BEBANDEM
KARANGASEM
BALI**

KETATWANING DESA ADAT TOHPATI

Duk isaka warsa yusaning Bumi : 1700 ring jagat Karangasem, Madeg anyakra werti atenggeran Ida Anak Agung Angelurah Ketut Karangasem. Purin Ida ring Puri Karangasem. Wawidangan jagat Idane sisi kulon mewates Tukad Krekuk. Sakeng tukad kreku punika nganginang kantos ketepian segara kangin kewawa antuk sang amawa rat ring Karangasem. Sakeng tukad Krekuk ngawuhang kawisesa antuk jagat Sibetan, Duk warsa punika ring jagat Sibetan maka manggala mawisesa atenggeran I Gusti Ngurah Mantu, Linggih dane Nyakra werti kealih sang kalih sane sampun kasub sakti mawisesa. Pingajeng sane maparab Ida Bagus Pinatih sakeng Geria Timbul Sibetan. Malih adiri mapasengan I Gusti Mambal, Iron dane ring Macang.

Sang umadeg ring Karangasem minakadi ring Sibetan sami ngukuhang jagat Idane, Irika raris Ida Anak Agung ring Karangasem mekayun – kayun mangda jagat Karangasem punika dados asiki. Rumasa kobet kayun Ida Jaga Metanding yuda memeseh Sibetan. Seantukan sampun kaloptah mungguing kesaktian dane, I Gusti Mantu. Dane polih panugrahan Betara ring Pura Bangkak, Rihin dane mapinunas ring Pura mangda sakti mawisesa tan samening manusa. Sesampun kalugraha suwening-asiwewetu tegil saking luhuring silit dane, Mawinan lumrah parab dane I Gusti Mantu Jitmetegil.

Punika ngawinang res-res kayun Ida Anak Agung, tandumade rarem ring Puri Karangasem ketangkil antuk para manggala, wenten raris pamutus ngerencana naya wiweka. Kalaning rahina becik nangkil raris Ida Anak Agung, ring Ida Pedanda Buda ring Geria Taman Sari Budakeling, kalih ring Ida Pedanda Siwa Geria Bungaya. Sesampun keaturang sami separi indikane sami antuk Ida Anak Agung, ring gelis Ida Pedanda Bungaya noronin Ida Bagus Pinatih ring Sibetan. Irika raris Ida Pedanda mewartarah mangda kayun Ida Bagus mebersih dados Pedanda. Kedeh yun Ida Pedanda kewanten durung kairing arsan Ida Pedanda. Irika raris kapidenin kawisesan Ida Bagus antuk Ida Pedanda, Telas kawisesan Ida Bagus Macepuk ring kedarman kayun Ida Pedanda. Wanu raris Ida Bagus Pinatih ngiringang kadi arsan Ida Pedanda. Tan asuwe mediksa raris Ida Bagus tan dumade Ida Pedanda Bungaya lumaku Nabe, Ngawit duk punika raris Ida Bagus sane sampun kengin Pedanda tan kalugra malih ngadu kawisesan wiadin sareng mayuda. Mungguing pengabih dane sane ring Macang, Kerawuhin antuk I Gusti Karangasem, Irika raris ngawentenang pasobaye usan ngabih dane Gusti MANTU, kewantenan mangda polih laluputan.

Ceritayang mangkin kewentenan ring Geria Taman Sari Budakeling, sesampun puput pinunas Ida Anak Agung, irika raris mapineh-pineh Ida Pedanda. Rikalaning rahina becik irika raris Ida Pedanda ngesengin parekan saking Saren. Duk punika sampun Ida Pedanda sayaga mekarya sewala patra antuk pripih mas. Suaran sewala patra punika sampuniki: Ih Cening Ngurah Mantu getep tegil Ngurahe, sinah pacangnungkul Agung Karangasem. Asapunika kirang rangkung sane gumanti pisan mangda tegil kawisesan. I Gusti Mantu prasida magetep. Semeng kosapang nangkil parekan sakeng Saren ring Ida Pedanda, Daging pawecanan Ida Pedanda, tan sios, parekane kandikayang ngaturang pripih mas majeng ring Betara malingga ring Bangkak. Nedeng becik kala punika nemonin Tilem mangda ring wengi punika memargi ke Pura Bangkak. Nenten purun piwak parekane, Tan dumade ngeraris memargikalaning tengah wengi. Minab sangkaning kasucian adnyanan Ida Pedanda mewastu tan pisan ipun ajrih yadiastuning memanggihin mategepan sedaging wengine. Bawosang raris mangkin kalaning benjang semengane, Rawuh Jambanggul Betara ayat mebersih kekantenang raris wenten Pripih Mas piturun ringsanggar Agung. Irika raris keaturang majeng ring dane I. Gusti Ngurah Mantu. Sesampun pretiaksa kewacenin, ring gelis dane ngererh tukang, jage ngetep tegil dane. Awanan wiakti polih tukang raris kategesin tegil danene.

Enengakene punika ceritayang mangkin sesampun Ida Anak Agung Karangasem miastra gatra sujati, Antuk wewekane sampun kasidan. Raris Ida ndawuhin watek bala yudan idanejaga ngerek pengadeg Sibetan. Kalih ngambil genah payudan irika dangin Tukad Krekuk wenten padusunan mawasta Karang Pati. Tukade kengin dados bates payudan duaning irika bates wewidangan, Mangkin rahina payudane, Gewar pawongane ring Karang Pati, Duk punika Karang Patine kegenahin antuk Wang Islam. Sami ipun magingsir makta sedaging umah amung sane kantun katinggalang wantah bukti kubur kemaon. Pabelesat sami wang Muslimin punika, wenten ring Karangasem ngewangun Banjar Karang Pati kewanten sane akehne ring Kecicang. Sesampun napak ring pasobaya bulus tenggeran Purine makacihna para wadwa minekadi para watek balayudan sampun memargi. Serawuhe ring Karang Pati, Kekantenang taler balayudan Sibetan. Atap sayaga ngantos sedawuh Tukad. Sami digelis ngarepang ring tukade rame yudane akweh para pangiring pejahing rananggana madugdug-dugdug mangkening manusa ring tengah Tukad. Ring pamuput alah sira I. Gusti Mantu Jitmetegil malayu anuju Selat. Bengu merkuk

ambunwangke ring Tukad punika. Awinan lumbrah kabaos Tukad Krekuk utawi Tukad Pati. Ngawit duk punika wewengkon Sibetan kewawe antuk Agung Karangasem. Yan akudang warsa sampun lintang, magentos pengadeg Karangasem, Raris ngadeg anyakra werti meparab;

Ida Anak Agung Gede Putu, Pinaka pengabin linggih Ida wenten malih sareng tiga mapesengan:

1. Anak Agung Gede Oka.
2. Ida Bagus Ngenjung.
3. I. Gusti Karangasem

Pengadeg Ida sang amawerat duk warsa isaka:1752, Duk punika taler Ida Anak Agung Gede Putu, Ngendikain pangiring Ida sane mawasta : I. Sarwa kalih I. Alep magda ngewangun Desa, Kalih kicen Piagem Desa. Ngawit duk punika desa punika mewasta :

Toh-Pati, Toh meteges Pebuat, Pati meteges Urip. Dados wenten desa sangkaning Metoh-Pati, Lumbrah kebawos Desa Tohpati. Ngeraris ikeliang Desa kalih kesarengin antuk Pekraman Desa Ngewangun pesangkepan kalingga tanganin antuk Ida Anak Agung Gede Putu, Anak Agung Gede Oka, Ida Bagus Ngenjung, I. Gusti Karangasem : Duk punika rahina Buda Kliwon Ugu Pangglong ping 6, Sasih ka 3, Rah ka 2, Tenggek 5, Isaka Yusaning Bumi : 1752. Ngawit warsa punika Desane ring Tohpati ngewangun Bale Desa utawi Bale Banjar ngaris ngewangun Kahyangan Tiga : Pura Desa, Pura Puseh, Pura Dalem.

Kasuwen-suwen duk rahina : Saniscara Umanis Tolu, Sasih ka 5, Tanggal ping 12, Rah 7, Tenggek 9, Isaka Yusaning Bumi : 1797. Kala Punika Desane ring Tohpati Ngaturang Pecaru Mesesapuh kalih Ngenteg Linggih ring Pura.

Asapunika ketatwan Desa Adat Tohpati dumadak saregsami memangguhang Dirgahayu-Dirgayusa.

Om. Santih... Santih...Santih Om.

PIDAGING

MAKA BANTANG AWIG-AWIG DESA ADAT TOHPATI

	“ Widang ”
MURDHACITA	1
SARGA I. ARAN LAN WEWIDANGAN DESA	1
SARGA II. PETITIS LAN PAMIKUKUH	1
SARGA III. SUKERTA TATA PAKRAMAN	1
Palet 1 Indik Krama	1
Palet 2 Indik Prajuru	3
Palet 3 Indik Sangkepan Lan Paruman	4
Palet 4 Indik Kulkul	5
Palet 5 Indik Padruwen Desa	6
Palet 6 Sukerta Pamitegep	7
Kaping 1 Karang, Tegal lan Carik	7
Kaping 2 Indik Kakayonan	8
Kaping 3 Wawangunan	8
Kaping 4 Wawalungan	9
Kaping 5 Indik Bhaya	9
Kaping 6 Panyanggran Desa	10
SARGA IV SUKERTA TATA AGAMA	10
Palet 1 Indik Paryangan	10
Palet 2 Indik Resi Yadnya	12
Palet 3 Indik Pitra Yadnya	12
Palet 4 Indik Manusa Yadnya	14
Palet 5 Indik Bhuta Yadnya	14
SARGA V SUKERTA TATA PAWONGAN	15
Palet 1 Indik Parabian	15
Palet 2 Indik Palas Marabian	16
Palet 3 Indik Sentana	18
Palet 4 Indik Warisan	18
SARGA VI WICARA LAN PAMIDANDA	20
Palet 1 Indik Wicara	20
Palet 2 Indik Pamidanda	20
SARGA VII NGUWAH NGUWUHIN AWIG-AWIG	20
SARGA VIII PAMUPUT	21

Lampiran : TEAM PENYEMPURNAAN / PENELITI AWIG-AWIG DESA ADAT KABUPATEN
DAERAH TINGKAT II KARANGASEM.

MURDHAGITA

Om Swastiastu, Om Awighenamastu nama shidham.

Putusing Paseban Krama Desa Adat Tohpati gumawe Awig-awig Desa Pakraman maka sepat siku-siku pamikukuh, wastu kasidan Prayojanan mami kabeh presama angidep muah amagehaken kadi linging Awig-awig iki.

SARGA I ARAN LAN WAWIDANGAN DESA Pawos 1

- 1) Desa Adat puniki mawasta Desa Adat Tohpati.
- 2) Jebag wawidangan mawasta nyatur :
 - a. Sisi kangin : Tukad utawi Desa Adat Budekeling lan Saren ;
 - b. Sisi kelod : Desa Adat Jungseri ;
 - c. Sisi kauh : Tukad Utawi Desa Adat Bebandem ;
 - d. Sisi kaler : Desa Adat Liligundi
- 3) Desa Adat puniki kawangun oloh karma Pengarep.

Pawos 2

- 1) Manut trilingganing desa kakuwub wewidangan pinara tiga luwire :
 - a. Utama Mandala, tegak Kahyangan Desa ;
 - b. Madia Mandala, makadi papupulan karang paumahan lan telajakan desa ;
 - c. Nista Mandala, makadi Setra Desa.

SARGA II PETITIS LAN PAMIKUKUH Pawos 3

Desa Adat Tohpati ngamanggehang dasar :

- a. Pancasila ;
- b. Undang-Undang Dasar 1945
- c. Trihita Karana

Pawos 4

Petitis Desa Adat Tohpati luwire :

- a. Mikukuhang miwah ngerajegang Sanghyang Agama ;
- b. Ngutamayang tata prawertine ma Agama Hindu ;
- c. Ngerajegang kasukertan desa saha pawongania sekala niskala.

SARGA III SUKERTA TATA PAKRAMAN

Palet 1 Indik Krama Pawos 5

- 1) Sane Kabawos Krama Desa inggih punika kulewarga sane ma Agama Hindu lan ngamong ayahan desa tur sampun bulangkep.
- 2) Krama Desa wenten tigang soroh luwire :
 - a. Krama Desa Pengarep ;
 - b. Krama Desa Sesabu ;
 - c. Krama Tamiu
- 3) Sabinaning sekeha-sekeha manut adat, kewentenang sekeha teruna sane kaiket antuk Desa Adat

Pawos 6

- 1) Krama Desa Pengarep inggih punika Krame sane ngamong karang ayahan desa.
- 2) Krame Sesabu inggih punika Krama sane tan ngamong karang ayahan desa.
- 3) Krama Tamiu inggih punika Krama saking dura desa magenah ring palemahan Desa Adat Tohpati mawaneng 3 sasih tur sampun bulangkep.

Pawos 7

Ngawit dados krama desa :

- a. Krame Pengarep lan Sesabu, saking parabiane mawates rauh dina pasangkepan sawusan mabiakala ;
- b. Krama Tamiu, 3 sasih jumenek ngerereh pangupa jiwa sajeroning palamahan Desa Adat Tohpati tur sampun bulangkep.

Pawos 8

Wusan dados krama riantukan :

- a. Seda ;
- b. Sangkaning nyada manut lokikan sangkepan desa ;
- c. Sangkaning pinunas ngaraga macihna sungkan-sungkunan wiadin megingsir genah kadura desa ;
- d. Sangkaning kaeladang riantukan stata mamurug awig-awing, pararem lan paswara.

Pawos 9

Swadarmaning Krama tiosing ayah-ayah luwire :

- a. Drede atwang ring Desa Adat ;
- b. Tinut saturut ring sadaging awig-awig, paswara lan Pararem.

Pawos 10

Patuwas utawi olih-olihan Krama Desa luwire :

- a. Polih pasayuban, ngamonggehang luwir patitis tur kabawosin saha katibakin pamutus sehanan wicarania ;
- b. Nyarengin paruman utawi sangkepan desa tur mastikayang pamutus ;
- c. Nyuksukin ayahan sane kawenangang risampun munggah deha teruna ;
- d. Polih leluputan manut wiguna.
- e. Krama Tamiu polih pesayuban saha wicarania patut katiwakin pamutus.

Pawos 11

- 1) Sang wusan mekrame desa tan polih duman saking padruwen desa.
- 2) Krame Desa sane sampun elad nenten dados ngeranjingin utawi ngangge wewangunan sane kewangun utawi kapiara olih desa. Prade riwekas seda patut kepadem ring setra desa sakewanten wirangnia keni penanjung batu beras 25 kg.
- 3) Sang usan mekrame sangkaning rahayu, prade matulak malih patut tedun mekrame sekadi patute tur tan keni pengepok.
- 4) Krama Desa sane magenah ring dura desa weweg keni prebea wawangunan lan pengaci kadi patute. Yan mamurug riwekas tan dados ngeranjingin/nganggen padruwen Desa.
- 5) Prade wusane tan rahayu patut nunas keiwang-iwangan saha nawur sehanan utang-utangania ring ajeg sangkepan desa.

Palet 2
Indik Prajuru
Pawos 12

- 1) Desa Adat Tohpati kaenter antuk Prajuru Desa:
 - a. Kelian Desa Adat ;
 - b. Pangliman pinake wakil ;
 - c. Penyarikan pinake juru surat ;
 - d. Kubayan pinake pangamong druwen desa ;
 - e. Kesinoman pinake juru arah ;
- 2) Kesinoman akehnia manut wiguna saha megilir nyabran sasih.
- 3) Sajeroning ngenterang sukertan niskala Kelian Desa mingsing gihang pemangku Kahyangan Desa.

Pawos 13

- 1) Swadarmaning Prajuru Desa Adat luwire :
 - a. Ngenterang sedaging awig-awig, paswara miwah perarem desa ;
 - b. Nuntun tur ngenterang karma desa ngupati anut petites ;
 - c. Nuntun saha nyaksinin tata cara muah sehananing kauripan ngilitang sulur pakulewargan ;
 - d. Maosin tur niwakang pamutus sangkepan desa majeng ring krame desa sane mawicara.
- 2) Prade Prajuru Desane mamurug awig-awig keni pamidande nikel saking kramane

Pawos 14

- 1) Prade wenten krame mawicara, wenang wicarania kesupeksayang ring prajuru.
- 2) Risampun wicara inucap kebawosin olih prajuru, prajuru niwa-niwakang pamutus, prade pamutus inucap tan katerima kengin wicarania keaturang ring sang amawarat.
- 3) Prade pamutuse pateh ring sadaging pamutus prajuru, wenang karma inucap kadanda beras 25 kg.
- 4) Sehananing pamutus pitungkas tan lempas ring daging awig-awig, pasuara lan kaputusan pararem.

Pawos 15

- Petuwas utawi olih-olihan Prajuru Desa Adat Tohpati luwire :
- a. Luput sahanan papeson ;
 - b. Polih olih-olihan manut pararem.

Pawos 16

Prajuru desa kagentosin riantukan :

- a. Seda ;
- b. Pinunas ngaraga sasampun polih panungrahan saking sangkepan desa ;
- c. Macihna stata mamurug awig, kalih pasuara lan pararem ;
- d. Risampun tutug waneng dados prajuru desa selama 5 warsa tur dados kapilih malih.
- e. Ngerarianang utawi ngentosin prajuru desa patut manut ring pamutus paruman.

Pawos 17

Tata cara ngadegang prajuru desa :

- a. Saking karma pengarep
- b. Wikan ngewacen lan nyurat aksara bali utawi latin ;
- c. Tan cedangga
- d. Nenten naan macihna melaksana corah ;
- e. Kajudi ring paruman desa.

Palet 3
Indik Sangkepan Lan Paruman
Pawos 18

- 1) Sangkepan ring Desa Tohpati luwire :
 - a. Sangkepan desa kawentenang ngasasih utawi sanunggil Budha Paing ;
 - b. Napkala utawi padgetakala, maka jalaran arah-arah manut tetujon kawastanin paruman ;
 - c. Sangkepan prajuru desa kawentenang manut wiguna ;
 - d. Sehanan sangkepan manut aksara a ring ajeng tan dados karangkadang jantos asasih.
- 2) Pamargin Sangkepan sekadi ring sor :
 - a. Prasida lumaksana risampun katedunin antuk sang patut ngamiletin, maduluran suaran kulkul saha mabusana adat;
 - b. Ngawit macak sep-sepan saha riwusania macak karma sane sane nora tedun ;
 - c. Pamutus sangkepan wiadin paruman kautsahayang malarapan antuk gilik saguluk, prada tan prasida suarane sane makehan kasinanggeh pamutus.

Pawos 19

- (1) Indik sangkepan wiadin paruman desa :
 - a. Munjuk lungsuring pakraman makadi ayah-ayah kalih sulur artha berana ;
 - b. Krama patut nampenin, ngawijilin papineh, mataken, ngaturin kaputusan ;
- (2) Sahaning pamutus sangkepan desa kasinanggeh paruman pamitegep awig-awig.

Pawos 20

Sangkepan Prajuru Desa tan kawenang ngamedalang tategenan ring karma desane, sadurung polih pamutus saking sangkepan wiadin paruman desa.

Palet 4
Indik Kulkul
Pawos 21

- 1) Kulkul ring desa Tohpati luwire :
 - a. Kulkul desa ;
 - b. Kulkul Sekeha Teruna ;
 - c. Kulkul sekeha-sekeha manut wigunanin.
- 2) Tatepekan tabuh kulkul matiosan manut tatujon luwire :
 - a. Tengeran wali nguntit ;
 - b. Tengeran tedun ngayah utawi nurunang sane sampun kaarahang banban.
- 3) Tengeran kapanca bhaya luwire :
 - a. Artha bhaya, geni bhaya, toya bhaya, bayu bhaya bulus atuludan ;
 - b. Jiwa bhaya, wawu rebat bulus kalih tuludan ; sampunkanin bulus tigang tuludan; sampun padem bulus petang tuludan.
- 4) Tengeran kulkul kapanca bhaya ring ajeng patut katedunin saha makta gegaman manut rupan bhayane.

Pawos 22

- 1) Kulkul desa tan wenang katepek yan tan sangkaning pituduh prajuru, sajawaning kapanca bhya.
- 2) Rikala katiben panca bhaya sang sapa sira ugi wenang nepek kulkul manut tatanger bhayane tur sesampun nepek patur atur supeksa ring prajuru desa. Yan tan jati wenten bhaya wenang kadanda 100 kg beras.
- 3) Kulkul banjar bilih-bilih kulkul sekeha-sekeha tan wenang matehin sukat miwah suaran kulkul desa.
Yan mamurug kulkul inucap wenang kadaut olih desa.

Palet 5
Indik Padruwen Desa
Pawos 23

- 1) Padruwean Desa Adat Tohpati luwire :
 - a. Kahyangan Desa :
 1. Kahyangan Tiga (Pura Puseh, Pura Desa, Pura Dalem)
 2. Pura Ulun Suwi
 3. Pura Prajapati utawi Ulun Setra.
- 2) Piranti-piranti Desa Adat Tohpati luwire :
 - a. Panyimpenan druwen desa 1 (asiki) ;
 - b. Bale desa 1 (asiki)
 - c. Beji desa 1 (asiki)
 - d. Setra apelebahan ;
 - e. Pelaba pura, carik malinggah +- 1,610 Ha miweh tegal malinggih +- 0,260 ha
- 3) Lelanguan makadi tatabuhan lan ilen-ilen padruwean desa luwire :
 - a. Gong abarung ;
 - b. Ilen-ilen wali ring pura sakadi rejang, pendet miwah seraman.

Pawos 24

Piolih – olihan Desa Adat Tohpati sakadi ring sor :

- a. Piolih saking pelaba pura ;
- b. Paica saking guru wisesa ;
- c. Dana punia utawi aturan – aturan sane sioasan ;
- d. Urunan karma desa.

Pawos 25

- 1) Prajuru desa wenang ngetangang pamupon laba pura lan sapenunggalan druwen desa.
- 2) Pikolih lan pamuponia kaanggen prebea piodalan kalih kaanggen ngawangun ring desa.
- 3) Sakeluwiring padruwean desa patut wenten lekitania.
- 4) Sapasira ugi tan kalugra ngadol, ngadeang kalih makidihang padruwean desa, yan tan kacumpuin antuk karma desa sami. Prade mamurug kadanda 100 kg beras kalih padruwean desa inucap kadaut olih desa.
- 5) Sapasira ugi tan kalugra malaisang sekapan druwen desa. Yan mamurug sakapan inucap kadaut olih desa saha sang nyakap kadanda 25 kg beras.
- 6) Pretima, busana miwah peayah-ayah ring Pura Desa kesimpen ring Penyimpanan Desa

Pawos 26

- 1) Sinalih tunggil krama desa mapikayun nyitak ring karang desane patut polih panugrahan saking prajuru desa. Yan mamurug kedanda 25 kg beras.
- 2) Prade wenten krama desa nyitak ring sajeroning karang desa, macihna keadol, kepekedihang patut citakin inucap kadaut olih desa utawi manut pengarga saha kadanda 25 kg beras.

Palet 6
Sukerta Pamitegep
Kaping 1
Karang, Tegal lan Carik
Pawos 27

- 1) Sang ngenahin karang desa patut ngewatesin karang inucap antuk tembok sanistania pagehan mangda pekantenane asri. Yan mamurug kedanda 25 kg beras.
- 2) Penyengker sisi kaler miwah kangin patut kekaryanin antuk sang ngamong karang inucap, kewastanin gegaleng kaluwan.
- 3) Prade penyengkere kesinanggeh ngelikadin, yan pada arsa penyandingnia kengin batese nganggen pinget kewanten kesaksinin antuk prajuru desa saha lekitania.
- 4) Rikala jagi aci ring pura Kahyangan desa kawentenang rerampagan kelapa, pisang, tiying ring sakuwuban desa adat Tohpati.

Pawos 28

Sinalih tunggil krama desa tan dados :

- 1) Ngelahlah tegak kahyangan, setra lan sekancan tegak sane kasinanggeh suci. Yan mamurug kedanda 5 kg beras tur ngewaliang tegak sane kelahlah maweweh upekara panyangaskara eka sate.
- 2) Ngelahlah tegal, karang, margi miwah sane siosan. Yan mamurug kedanda 5 kg beras tur ngewaliang tanah utawi tegak sane kelahlah.
- 3) Ngentungang wangke wewalungan kapekarangan krama desa siosan, kemargine, kerurunge, ketegale lan carik. Yan mamurug kedanda 5 kg beras saha wangke wewalungan inucap patut katanem olih sang ngentungang.

Kaping 2

Indik Kekayonan

Pawos 29

- 1) Ngawit nandur tanem tuwuh patut adepa agung ngajeroang saking watese.
- 2) Prade wenten taru mentik ring sajeroning wates kangin kawara antuk panyandinge, mangda taru inucap karebah kesaksinin antuk prajuru desa tur taru inucap kapinara tiga, asiki katur ring desa muwah sane kakalih kaepah ring sang madruwe wates manut lokika.
- 3) Prade wenten wit taru kasinanggeh mayanin, sang kajerihan patut atur supekta ring prajuru desa mangda taru inucap karebah, sanistania kapunggul.
- 4) Prade wenten mayanin wewangunan, sane keni prebea mecikang wawangunan inucap saha panyangaskara utawi pakeludan :
 - a. Sang madruwe wit taru sane kasinanggeh mayanin risampun polih keware ;
 - b. Sang ngarebah utawi munggul taru inucap ;
 - c. Taru inucap kapinare tiga, apah tigaan kadesa, kalih pahtigaan kaepah ring sang madruwe wates manut lokika.

Pawos 30

- 1) Yan wenten krama ngarebah taru pacang kaanggen mapewangun utawi ngadol patut ngarereh lekita ring prajuru desa adat.
- 2) Prade kapurug :
 - a. Yan ngarebah taru kekeran desa utawi ngarebah taru ring tanah druwen desa kakeninin danda awit 15 kg beras tur taru inucap kadaut olih desa ;
 - b. Prade taru tan kekeran desa karebah, kadanda 10 kg beras sane awit.

Kaping 3

Wawangunan

Pawos 31

Wawangunan patut nganutin Tri Hita Karana :

- a. Tan ngungkulin kapisaga ;
- b. Prade wenten ngungkulin risampun kasadokang ring prajuru desa tur wawangunan sane ngungkulin patut kared sanistania kakaryanang abangan ;
- c. Prade ngawangun ngalintangin wates patut ngawentenang paigum tur kasadokang ring prajuru saha lekita.
Yan mamurug riwekas kewara antuk panyandinge, wawangunan inucap patut kaurad saha tan polih prebea kapocolan.

Kaping 4
Wewalungan
Pawos 32

- 1) Sehanan krama desa sane mamiara wewalungan patut nitenin negul utawi ngelogorin mangda tan ngerusak karang utawi bangket/pakubonan krama siosan.
Yan mamurug keni danda 5 kg beras tur ngewaliang sane rusak manut pengarga.
- 2) Prade ngerusak tegak suci sajaba keni pamidanda manut wiwit (1) meweh upekara penyangaskara eka sate.
- 3) Prade naban wewalungan, sang naban patut premangkin atur supekta ring prajuru desa tan kengin kasepan ring arahina saha wewalungan inucap kapiara kadi patute kalih sang madruwe wewalungan patut nebas prebea panginunia.
- 4) Prajuru sesampun polih atur supekta patut digelis maosin.

Pawos 33

- (1) Tan kelugra ngangon miwah negul wewalungan ring :
 - a. Palemahan tegak kahyangan utawi pamerajan ;
 - b. Pundukan bangket / kubon miwah pagedan krama siosan kalih ring margi – margi sewidangan desa ;
 - c. Prade mamurug sekadi inucap ring ajeng keni danda 5 kg beras.

Kaping 5
Indik Bhaya
Pawos 34

- 1) Sane kasinanggeh bhaya inggih punika Panca Bhaya, luwir ipun :
 - a. Jiwa bhaya utawi kebhaya pati ;
 - b. Geni bhaya utawi kapuwunan ;
 - c. Bayu bhaya utawi angin lilus ;
 - d. Toya bhaya utawi kegentuhan ;
 - e. Artha bhaya utawi kemalingan ;
- 2) Rikala ketiben Panca bhaya sang sapesire ugi kapatut nepak kulkul manut tatanger bhayane tur sesampun nepak patut atur supekta ring prajuru desa. Yan tan jati wneten bhaya wenang kedanda 100 kg beras.
- 3) Yan wenten krama desa katiben artha bhaya luwir ipun kemalingan patut digelis atur supekta ring Prajuru desa sane pacang nimbangin tur mutusang manut putusan sangkepan.

Kaping 6
Panyanggran Desa
Pawos 35

Krama desa rikala ngawangun Yadnya utawi karya suka-duka kengin nunas panyanggran desa.

SARGA III
SUKERTA TATA AGAMA

Palet 1
Indik Paryangan
Pawos 36

- 1) Kahyangan desa adat Tohpati luwire :
 - a. Pura Puseh ;
 - b. Pura Desa ;
 - c. Pura Dalem ;
 - d. Pura Ulun Suwi ;
 - e. Pura Prajapati utawi Ulun Setra.
- 2) Rahina piodalan ring soang-soang kahyangan inucap kadi ring sor :
 - a. Pura Puseh ring rahina Purnama Kalima ;
 - b. Pura Desa ring rahina Purnama Kedasa ;
 - c. Pura Dalem ring rahina Anggara Kasih Kajeng Kliwon ;
 - d. Pura Ulun Suwi ring rahina Purnama Kalima ;
 - e. Pura Prajapati ring rahina Anggara Kliwon.
- 3) Pangaci ring pura-pura inucap manut kecap Sastra Agama, saha kalaksanayang nista, madya, utama nganutin kawentenan lan perarem.

Pawos 37

- 1) Ring Pura Kahyangan Desa patut kaadegang Pemangku.
- 2) Ngadegang Pemangku manut dudonan :
 - a. Nunas pamuwus widhi utawi nyajan ;
 - b. Ngawilang saking turunan utawi ngewaris ;
 - c. Kajudi olih krama desa adat ;
 - d. Wikan ngewacen miwah nyurat aksara bali lan latin.
- 3) Tan wenang kaadegang Pemangku luwir ipun :
 - a. Cedangga luwire peceng, perot, cungh, lan sapenunggilania ;
 - b. Macihna sungkan – sungkanan ;
 - c. Macihna malaksana corah.

Pawos 38

- 1) Swadarmaning Pemangku luwire :
 - a. Nitenin utawi nuntut kasucian kahyangan ;
 - b. Ngenterang upecara piodalan ring pura Kahyangan desa ;
 - c. Ngaturang penawuran wiadin sosot sinalih tunggil krama desa utawi krama dure desa.
- 2) Indik nawur sosot wiadin aturan :
 - a. Sang pacang nawur sosot wiadin aturan sane pacang leleb katur kepura patut supeksa ring prajuru desa samangdene sosot wiadin aturan inucap kalekitayang tur mangde dados padruwen desa ;
 - b. Sang pacang nawur sosot marupa ngaturang ilen-ilen wiadin uni-unian patut matur supeksa ring prajuru desa mangda kelekitayang ;
 - c. Sang pacang maturan sosot marupa upekara bebantenan tur pacang kelayub malih patut supeksa ring Pemangku.
- 3) Saluwiring pamuput yadnya wenang nuwur sang sulinggih wiadin nunas tirtan Ida pinaka pamuput yadnya inucap.
- 4) Sane dados nyanggra Jero Mangku ring Kahyangan Tiga inggih punika Prajuru desa kalih teruna Adat.
- 5) Rikala Jero Mangku pacang ngantebang upekara piodalan ring Kahyangan Desa patut mepengangge sarwe petak.

Pawos 39

Petuas utawi olih-olihan Pemangku luwire :

- a. Luput ayah – ayah lan pepeson ;
- b. Petuas seosan manut peparem.

Pawos 40

Pemangku kagentosin siantukan :

- a. Seda ;
- b. Pinunas ngeraga macihna sungkan – sungkanan ;
- c. Macihna melaksana corah.

Pawos 41

Prebea upekara pawintenan Pemangku Desa kamedalin saha kalaksanayang antuk desa.

Pawos 42

- 1) Tan kalugra ngeranjing kepura luwire :
 - a. Sebel sangkaning kesedaan salami 11 rahina, ngeraris marerebu ;
 - b. Sebel ngeraja sewala ;
 - c. Sebel ngembasang putra salami 42 rahina ;
 - d. Sebel keruron salami 42 rahina ;
 - e. Sebel pawiwahan sadurung ngemargiang pabeakalaan.
- 2) Yan mamurug sinalih tunggil kecap ring ajeng kadanda upekara marisuda pura inucap.

Pawos 43

Pretingkahe tan wenang ring Pura luwire :

- a. Masumpah utawi ngayib cor, sajawaning pituduh prajuru desa ;
- b. Sang makemit ring pura lanang istri tan dados sirep dados asiki mawenang sampun munggah deha teruna ;
- c. Munggah tedun pelinggih sajawaning pituduh prajuru utawi Pemangku ;
- d. Prade kahyangan kahanan kadurmanggalan luwire kapancabhaya, sapisira ugi ngemanggihin mangda digelis atur supeksa ring prajuru desa mangda ngawentenang upecara pamayuh kadi patute.

Palet 2

Indik Resi Yadnya

Pawos 44

Sang madruwe yadnya patut ngaturang punia ring sang sane muput yadnyane.

Pawos 45

Prajuru patut ngawas tur ngayomin, mialangin yan wenten pamargi ngalantudin pamargin yadnyane.

Pawos 46

- 1) Krama desa adat patut ngawas, nintenin katuntun antuk prajuru mangda sehanan yadnyane sane kawentenang kaicen pamuput olih sang sulinggih utawi Pemangku manut dresta,
- 2) Prajuru patut nuntun saha ngamanggala Krama Desa Adat ngawas, nintenin sapamargin Wikune ring wawidangania, pamekas mikukuhin kasucian linggih Ida.
- 3) Ngaturin sang muput dana punia manut agung alit yadnyane.
- 4)

Palet 3

Indik Pitra Yadnya

Pawos 47

Pamargin Pitra Yadnyane madudonan manut sekadi ring sor :

- a. Makingsan ring ibu pertiwi utawi ring geni ;
- b. Atiwa- tiwa utawi kaabenang tur sane kadadosang risampun ketus untu, prade durung ketus untu ngawit saking yusa tigang sasih patut kaabenang ngalungah.

Pawos 48

Swadarmaning lan tategenan prade wenten sinalih tunggil krama desa kasedaan :

- a. Sang kasedaan patut atur supeksa ring prajuru desa tur nunas tatimbang ring kawentenania, ngaturang ring desane prade kapendem utawi kaabenang ;
- b. Prade kapendem wiadin kagesang utawi kaabenang mangda wenten arah-arah ring krama desa ;
- c. Penyanggeran krama desa sakadi ring sor :
 1. Soang – soang krama desa ngamedalang patus sami 1 kg beras, yan mendem utawi ngeseng ;
 2. Ngarembe pamargin upacarane :
 3. Krama desane nganter kasetra jantos pamendemane puput ;
 4. Pamargin sawane miwah upecarane mangda dabdab antar.

Pawos 49

Nenten kadadosang mendem utawi ngesang sawa rikala :

- a. Betara nyejer ;
- b. Larangan desa ;
 1. Purnama ;
 2. Tilem ;
 3. Pasah utawi busaya.

Pawos 50

- 1) Sangkaning seda kapengawan kengin kapretea kadi patute risampun kamenggala antuk upekara banten panebusan lan pangulapan.
- 2) Prade wenten anak seda sajeroning desa pakraman luwire bangket, tegal, margi, pekarangan anak siosan patut wiring sang madruwe sawa inucap warayaseita ring genah punika.
- 3) Asapunika taler yan wenten ngamargiang sawa ngalintangin bangket, tegal wiadin pakarangan anak sioasan, patut sang madruwe sawa inucap marayascita genah inucap.

Pawos 51

Tan keneng cuntaka luwire :

- a. Sang sulinggih ;
- b. Pemangku kahyangan tiga.

Pawos 52

- 1) Atiwa – tiwa utawi pengabenan wenten 2 pawos :
 - a. Sawa pernawa ;
 - b. Swasta ;
 - c. Sawa Preteka.
- 2) Pamargin dresta pangabenan wenten 3 soroh luwire :
 - a. Ngaben dadakan antuk prebea muwah pangamong karya manut dresta ;
 - b. Ngben Manca Dewasa utawi ngaben nauka, prebea muwah panyanggera manut dresta ;
 - c. Ngaben Ngerit kasanggera antuk krama desa manut dresta miwah pararem.
- 3) Pangambilan upekara ring ajeng nista, madya, utama manut dresta maduluran sastra agama.

Palet 4

Indik Manusa Yandya

Pawos 53

- 1) Manusa Yadnya inggih punika upekara upekara darmaning manusa ngawit saking petemoning kame petak kalwan kama bang sajeroning garba ngantos seda riwekas.
- 2) Sang pacang mapodgala madwijati, sejaba nunas panugrahan ring sang Amawarat patut atur supeksa ring prajuru desa.
- 3) Prajuru desa sareng nitenin, nureksa mangda sulur miwah pamargine jati –jati manut ring kecaping agama.
- 4) Sesampun puput padwijatine, prajuru desa patut digelis ngentosin pesengan sang madwijati ring sahanan lekita antuk biseka kawikon manut panugrahan nabene saha kasiarang ring paruman desa.

Palet 5

Indik Bhuta Yandya

Pawos 54

- 1) Bhuta Yadnya inggih punika upekara pabyakalaan, pecaruan lan pasegehan majeng ring babutan.
- 2) Upekara pecaruan lan pasegehan inucap manut wiguna nista, madya, utama inggih punika :
 - a. Ekasata ;
 - b. Pancasata ;
 - c. Rsigana ;
 - d. Mancakelud ;
 - e. Mancasanak ;
 - f. Tawur Kesanga ;
 - g. Tabuh Gentuh.

Pawos 55

- 1) Nangken ngawarsa ritakalaning tilem kesanga olih desa kawentenang tawur kesanga utawi mecaru ketah kabaos ngerupuk, maka cihna pacang mapag rahina panyepian benjangne.
- 2) Upecara penyepian sane kamargiang antuk krama desa luwire :
 - a. Amati Geni, tan kengin meapi-api ;
 - b. Amati Karya, tan kengin mekarya utawi nyambut karya ;
 - c. Amati Lampah, tan kengin medal saking pekarangane ;
 - d. Amati Lelangunan, tan kengin nepak wiyadin nyuarayang sakeluring sane ngamedalang suara.
- 3) Paberatan inucap kamargiang arahina, saking semeng kantos semeng benjangne. Raris kasuarang kulkul maka cihna pengembak.
- 4) Sang mamurug sinalih tunggil kecaping ring ajeng keni pamidanda 1 kg beras, sajawaning saking pituduh prajuru desa.

SARGA IV
SUKERTA TATA PAWONGAN

Palet 1
Indik Perabian
Pawos 56

- 1) Sane kasinanggeh perabian inggih punika patemoning purusa lawan predana malarapan panunggalan kayun suka cita kadulurin upekara pawidi widanaan.
- 2) Pemargin perabian luwire :
 - a. Pepandikan, maduluran antuk suka cita sang kaning paigum pakayun kulawarga sang kalih ;
 - b. Merangkat, melarapan antuk suka cita lanang istri, nanging tan kawikanin, antuk kulawarga sang istri. Reraman lanange patut ngewentenang pejati. Yening tan wenten pejati patut reraman sang istri ngewentenang panegdeg .
- 3) Sesampun kawentenang penegdeg tur macihna sami suka, raris malih tigang rahina patut kawentenang pamilaku, ngelantur raris nunas pamuput pamargin rangkate.
- 4) Makecihna sah makurenan yan sampun mawidi widana kalih kasaksiang antuk prajuru desa lan sang amawarat.
- 5) Sajeroning pengantenang sang lanang lan istri tan dados medal sadurung pabeakalaan. Pabeakalaan kemargiang rahina kaping tiga saking rahina pengantenane. Yen mamurug kedanda 50 kg beras.
- 6) Pidabdab sang pacang merahinan patut :
 - a. Sampun mungguh deha teruna ;
 - b. Sangkaning pada suka utawi tan paksa ;
 - c. Nganutin kecaping agama utawi tan gamia gamana ;
 - d. Kasudwadani prade pengambile sios agama miwah kapatiwangi.
 - e. Pemargin perabiane mangda nganutin undang – undang perkawinan saking sang amawarat.
- 7) Yen wenten kerangkatang utawi ngerangkatang kedure desa, wirangnia patut atur supeksa ring prajuru desa kalih sang amawarat. Yan mamurug wirangnia wenang kedanda 5 kg beras.

Pawos 57

- 1) Tata cara perabian kadi ring sor :
 - a. Tan dados ngerangkatang tumin dinyame, pianak temen, rerama dinyama, semeton sodet, semeton sios ibu, semeton dicambra lan semeton paperasan.
Yan mamurug wenang kapalasang tur kadenda upekara prayascita ring genah inucap.
 - b. Yan wenten memaksa wiadin melegandang anak istri, patut kadegdeg antuk prajuru desa kesarengin antuk sang amawarat.
 - c. Yan wenten drati krama, macihna ngarabini wong alaki rabi, patut kedanda sasayut prayascita ring genah inucap, semalihne sang melaksana kadenda 100 kg beras.
Yan wenten anak mamitra ngalang prajuru desa patut maosin. Prade lanang kalih istrine sami – sami deha teruna patut merangkat tur mawidi widana sekadi patute mewaneng asasih saking pamutus prajuru desane. Yan mamurug kadenda 100 kg beras tur wicarania katur ring sang amawarat.
- 2) Perabian sane kemargiang ring desa adat Tohpati, indik pawidi widanaan, kapuput antuk Pedanda utawi Pemangku kamanggala antuk tirtan Pedanda saha kesaksinin antuk prajuru desa kalih sang amawarat sane jaga mapekelingang utawi ngelekitayang pawiwahane.
Yan mamurug kecap ring ajeng kadenda 100 kg beras saha pawiwahane kebaosang durung sah.

Palet 2
Indik Palas Marabian
Pawos 58

- 1) Parabian prasida usan malarapan antuk palas utawi kesedaan.
- 2) Wusan makurenan riantukan sinalih tunggil seda mapiteges balu makadi balu lanang utawi istri.
- 3) Palas merabian wenten sangkaning pada lasya utawi mawiwit wicara macihna tan tumus suka citaning panunggalan idep sang alaki rabi mapiteges nyapian.

Pawos 59

- 1) Tata cara palas merabian :
 - a. Yan wenten krama desa mapikayun jagi palas merabian, patut atur supeksa ring prajuru desa, olih prajuru desa wicarania kebaosin tur kaicen tetimbang ring paruman prajuru desa. Tetimbang punika mangda setata ngutsahayang adung malih.
 - b. Yan tetimbang prajuru desa tan ketrima, wicarane dados kelanturang ring sang amawarat, prade tatimbang desane pateh ring pamutus sang amawarat kadanda 100 kg beras.
 - c. Palas marabian kasinanggeh sah sesampune polih pamutus saking Pengadilan Negeri saha kakesiarang ring sangkepan prajuru kalih sangkepan desa.
- 2) Sang palas merabian patut nganutin uger – uger sekadi ring sor :
 - a. Artha saking paguna kaya polih pedum pateh ;
 - b. Artha pabaktayan utawi tetatadan tan patut kaedum ;
 - c. Artha warisan manut waris kapurusa.

Pawos 60

Prade riwekas sang palas macuhna, adung malih patut :

- a. Ngalaksanayang pawiwahan malih. Prade palas malih kadanda 100 kg beras.

Pawos 61

Swadarmaning balu istri patut :

- a. Kengin muponin olih 0 olihan warisan, nanging tan kuasa ngadol, makidihang, ngantahang lan siosan punika, sajeroning durung polih cihna kabebasan saking sang patut ngawaris ;
- b. Nguasayang paguna kaya sane kasinahang antuk saksi, bukti lan lekita ;
- c. Yan balu inucap ngangkat sentana kadadosang, yan sadurung sinalih tunggil seda sampun wenten cihna pidabdab tur kasetujuin antur kulewarga kapurusa ;
- d. Balu istri dados kaantukang ring wirangnia yan macihna mapamargi sakadi ring sor :
 1. Matilar tan pasadok saking pakukuban utawi umah rabine kantos masue tigang sasih ;
 2. Macihna mamargi nyolong semare.

Palet 3
Indik Sentana
Pawos 62

- 1) Mungguhing sentana wenten 3 soroh, luwire :
 - a. Pratisentana inggih punika sentana sane metu saking parabian kapatut ;
 - b. Sentana paperasan ;
 - c. Sentana rajeg.
- 2) Yan wenten perabian tan sida ngewetuang sentana, kengin meras sentana. Nanging mangda adung dumun ring waris purusa, muah ring waris sang pacang kaperas.
- 3) Sesampune adung kalih polih pamutus saking desa manut angka (2) ring ajeng wawu upecarane dados kamargiang manut pamargin anak meras ring Desa Adat Tohpati, tur polih lekita saking sang amawarat.

Pawos 63

Yan wenten krama desa ngembasang oka kembar buncing patut kaupekara kadi anak ngembasang oka kadi patute tur istrine sane ngembasang oka inucap tan dados ngaranjingin pura utawi karang krama siosan sadurung lad kambuhan.

Palet 4
Indik Warisan
Pawos 64

- 1) Warisan inggih punika tatamian artha berana saha ayah – ayah ngupadi sukerta sekala niskala saking kaluhurania arep ring katurunania.
- 2) Sane kasinanggeh warisan, luwire :
 - a. Duwe tengah, pemerajan lan pura sasuhunan ;
 - b. Pagunakayan, tatadtadan utawi jiwa dana ;
 - c. Hutang piutang.
- 3) Wawu kengin kebawos warisan prade wenten :
 - a. Sang mapiturun utawi pewaris ;
 - b. Wenten katurunania utawi waris ;
 - c. Artha berana miwah tategenan utawi ayah – ayahan maka cihna warisan.

Pawos 65

- 1) Sane kasinanggeh warisan luwire :
 - a. Pratisentana purusa ;
 - b. Sentana Paperasan ;
 - c. Sentana Rajeg.
- 2) Prade ten wenten sekadi ring ajeng, sane sinanggeh waris luwire :
 - a. Turunan purusa pernah ngunggahang, rerama lanang petak, selantur ipun rerama misan utawi mindon.
 - b. Turunan purusa pernah kesamping makadi keponakan misan, mindon, miwah selanturnyane.
- 3) Yan prade pewaris putung utawi camput tan madruwe waris, patut kawenang antuk Dadianyane, nanging karang ayahan Desa mewali ring Desa Adat.

Pawos 66

- 1) Swadarmaning waris patut :
 - a. Nerima saha ngawingenang tetamian duman saking keluhurannia, makadi ngerempon Sanggah, Pura saha pengupakarania miwah nyeledinin ayah – ayahan pewaris.
 - b. Ngabenang pewaris.
 - c. Nampi hutang piutang pewaris.
- 2) Pedum warisan manut tata cara sekadi ring sor :
 - a. Risampun kelaksanayang pengabenan, lan hutang – hutang pewaris buntas ketawurin.
 - b. Para waris polih pedum pada.
- 3) Sinalih tunggil waris tan polih duman prade :
 - a. Matilar saking Agama Hindu.
 - b. Nyentana utawi merangkat nyeburin, kebaos ninggal kedaton.
- 4) Pewaris kening mapeweh ritakala kanton maurip pinaka : jiwa dane, tan padan utawi bekel macihna paweh tetep ring pianak sane kesah merabian, pinih akeh apah tigaan saking padruweyannyane

Pawos 67

- 1) Karang Desa sane kasuwungan utawi tan kegenahin kantos tigang sasih antuk sang ngewaris, prajuru desa wenang niwakang ring Krama Desa sane durung madruwe karang

SARGA V
WICARA LAN PAMIDANDA

Palet 1
Indik Wicara
Pawos 68

- 1) Sehanan wicara sane kasinanggeh nungkasin daging awig – awig, paswara lan perarem patut premangkin kebawosin.
- 2) Sejaba punika patut nyantos sang nunas bawos.
- 3) Panepase patut pastika nyantenang iwang patut melarapan Tri Premana miwah tan maren nepek ring daging awig – awig.

Palet 2
Indik Pamidanda
Pawos 69

- 1) Desa wenang niwakang pamidanda ring krama desa sane mamurug awig – awig.
- 2) Tetiwak inucap kelaksanayang aolih Prajuru Desa Adat.
- 3) Agung alit pamidandane mesor singgih ring kasisipane.
- 4) Bacakan pamidanda luwire :
 - a. Danda artha muah panikel – nikelania ;
 - b. Ayahan panukun kesisipane ;
 - c. Panyangaskara ;
 - d. Kaeladang antuk krama desane ;
 - e. Kedaut karangnia.
- 5) Jinah utawi artha barana pamidanda ngeranjing dados druwen desa.

Pawos 70

- 1) Rikala pewanengan ngewaliang jinah papeson, dedandan lan dedosan yaning celed ring wewatesan keni pamidanda nikel.
- 2) Yaning malih asangkepan taler nenten ketawur, patut mewali nipilnia.
- 3) Prade malih asangkepane taler tan ketawur, wenang krama desane ngeladang.
- 4) Sang kaeladang kengin ngewalinin makrama desa malih risampun :
 - a. Nunas geng pengampura ring ajeng sangkepan desa ;
 - b. Nawur sakeluring hutang kalih dedandan kedesa ;
 - c. Nawur pengasah – asih 25 kg beras.

SARGA V
NGUWAH NGUWUHIN AWIG - AWIG





Pawos 71

- 1) Nguwah – nguwuhin awig – awig desa adat puniki kemargiang antuk perarem utawi sangkepan desa.
- 2) Paruman utawi sangkepan inucap mangda karawuhin antuk sekancan krama desane tur mabusana nyelempot.
- 3) Pamutus bawos mangda kadasarin antuk gilik saguluk utawi paras paros, yan tan presida suarane makehan kasinanggeh pamutus.
- 4) Paruman indik nguwah – nguwuhin awig – awig puniki kengin kamedalang antuk prajuru utawi krama niri – niri.



SARGA VII
PEMUPUT
Pawos 71




- 1) Sakeluwiring sane durung kabawos sajeroning awig – awig puniki patut kalaksanayang manut tata cara sane sampun mamargi kadulurin antuk perarem – perarem.
- 2) Awig – awig puniki kaadegang antuk prajuru desa kalih sampun kaingkupin utawi kasetujuin antuk krama desa sami duk rahina : Anggara Pon Menail tanggal ping siye, Sasih Kapat, Rah enem, Tanggal roras, Isaka 1914
- 3) Prajuru desa adat kalih Prajuru dinas sareng – sareng ngardi awig – awig puniki saha ngalingga – tanganin :
- 4) Luwir sang ngalingga tanganin

a. Kapertama Prajuru Desa Adat :

1. Kelian Desa Adat,  <u>I Wayan Sandhi.-</u>	2. Pangliman,  <u>I Komang Putra.-</u>
3. Penyarikan,  <u>I Wayan Sara.-</u>	4. Kubayan,  <u>I Made Oka Semedi.-</u>
5. Pemangku Desa, <u>Jro Mangku wgenteg.-</u>	

n. Kaping kalih prajuru dinas mako saksi :

1. Kepala Dusun Banjar Tohpati,  <u>I Wayan Rinjin Adi.-</u>	2. Kepala Desa Bebandem,  <u>I Wayan Gede Padang</u>
---	---

Amlapura, 6 October 1922.

Mengetahui dan telah dicatatkan :



BUPATI KEPALA DAERAH TINGKAT II
KARANGASEM,

Merttha


KETUT MERTHA, S.M.IK.


Lampiran :

TEAM PENYEMPURNAAN / PENELETI AWIG – AWIG DESA ADAT KABUPATEN DAERAH
TINGKAT II KARANGASEM.

- I. PENASEHAT : 1. Bupati Kepala Daerah Tingkat II Karangasem.
2. Sekretaris Wilayah / Daerah Tingkat II Karangasem.
3. Kepala Kantor Departemen Agama Kabupaten Karangasem.
- II. KETUA : I Wayan Sudiarta, SH (Kepala Bagian Hukum Setwilda Tingkat II Karangasem)
WAKIL KETUA : Ida Bagus Pidada Adnyana (Ketua Parisada Hindhu Dharma Kabupaten Karangasem.)
SEKRETARIS : Anak Agung Gde Rai, SH (Ka.Sub.Bag.Bantuan Hukum).
- III. ANGGOTA : 1. I Nengah Pasek. Sm.Hk (BPPLA Kab. Karangasem)
ANGGOTA : 2. I Gusti Made Djatmika (Parisada Kabupaten Karangasem).
3. I Ketut Bona (Staf Kantor SOSPOL Kabupaten Karangasem).
4. Drs I Wayan Suter (Staf Kantor Departemen Agama Kabupaten Karangasem).
5. Drs Ida Bgs Wayan Oka Diksa (Staf Kantor Dep. Agama Kabupaten Karangasem).
6. I Gede Bendesa (Staf Kejaksaan Negeri Amlapura).
7. I Made Suprpta, SH (Ka.Sub.Bag.Perlahlum pada Bagian Hukum).
8. I Dewa Putu Raka (Staf POLRES Karangasem).
9. I Gst Lanang Jendra (Staf Kesra Setwilda Tingkat II Karangasem).
10. Ida Bagus Ngurah SWD (Parisada Hindu Dharma Kabupaten Karangasem).
11. Ida Bagus Ketut Tantra (Staf Pengadilan Negeri Karangasem).
12. I Gede Semara (Ka.Sub.Bag. Dokumentasi Hukum pada Bag. Hukum).

Team Penyempurnaan/Peneliti Awig-Awig
Desa Adat Kab. Dati. II Karangasem.


I WAYAN SUDIARTA, SH


SEKRETARIS,
ANAK AGUNG GDE RAI, SH.